

宋

會

要

全唐文

治河

宋會要二 役河附

太祖建隆元年十月河決棣州厭次縣又決滑州靈河縣至二年七月遣右領衛上將軍陳承昭修塞之役成賜承昭錢三十萬三年十月詔汭黃汴河州縣長吏每歲首令地分兵種榆柳以壯隄防四年正月詔左神武統軍承昭修近甸丁夫數萬脩畿內河隄乾德四年六月鄆州東阿縣河水溢損民田澶州觀城縣河水溢入大名府壞廬舍開寶三年正月詔發近甸丁夫數萬增治河隄十二月又發二萬人治隄四年十一月河決澶淵泛數州官守不時言通判姚恕棄市知州

杜審聲坐免命棣州團練使曹翰濮州刺史安守忠部
勒脩塞 五年正月詔曰每歲河隄常須脩補訪聞科
取稍捷多伐園林全虧勸課之方頗失濟人之理自今
沿黃汴清御河州縣人戶除準先敕種桑棗外每戶並
須創柳及隨處土地所宜之木量戶力高低分五等第
一等種五十株第二等四十株第三等三十株第四等
二十株第五等十株如人戶自欲廣種者亦聽孤老殘
患女戶無男女丁力作者不在此限 三月詔曰朕每
念河隄潰決類為民災故嘗置使以專掌之思設佐僚
共濟其事自今開封大名府鄆瀋滄滑孟濮懷鄭齊棣
博德淄衛濱州各置河隄判官一員以逐州通判充如

開通判以本州判官兼領 五月澶州河決濮陽縣南
岸六月又決於陽武命棣州團練使曹翰馳騎經度脩
塞太祖曰朕方以霖雨又聞河決三兩日來宮中焚香
禱天若天災流行願移於朕躬幸勿殃兆民翰奏曰若
宋景公一言修德災星為之退舍陛下憂兆民懇禱如
是必應上感天心亦何慮河決為災邪即詔發開封河
南十三縣夫三萬六千三百人及諸州兵一萬五千人
修陽武縣隄澶濮魏博相貝磁洺滑衛等州兵夫數萬
人塞澶州河並令翰督役至十二月畢功 六年正月
遣德州刺史郭貴修魏縣隄 八月草澤王德方上修
河利害特賜同學究出身 八年五月河決濮州郭龍

村六月又決澶州頓丘縣遣內衣庫副史閻彥進發丁夫數萬修之十一月功畢 太宗太平興國三年四月河決懷州獲嘉縣至十月滑州言靈河縣河決已塞水復故道既而復決詔塞之命西上閣門使郭守文供奉官閻門祇候王侁西八作副使石全振護其役五年正月命連州刺史任知果虢州刺史許昌裔雄州刺史孫全興發丁夫理衛澶濮三州河隄左屯衛將軍李重進右千牛衛將軍鄭彥華右內率府率由浦發丁夫理濟鄭貝三州河隄 七年六月河決齊州臨濟縣又決大名府范濟河秋河大漲蹙清河侵鄆州城將陷塞其門急奏以聞詔遣殿前承旨劉吉馳往固之清河水退鄆

城不陷 昔江南一習水事故命之

雍熙二年正月遣

左領軍衛大將軍郭重吉等十三人監治河隄 端拱
二年五月滑州房村埽火焚竹木梢芟百七十餘萬詔
轉運使督汭河州縣官吏常令分行部內埽岸積聚之
物有檢視不謹為水所敗者坐其罪 淳化二年三月
詔曰今歲時雨霽霈州流暴漲慮河隄脆薄之處或有
蛇鼠所穴牛羊踐履岸缺成道積水衝注因而壞決以
害民田宜委諸州河隄使長吏以下及巡河主埽使臣
經度行視預圖繕治苟失備慮或至壞隄官吏當寘于
法 四年九月澶州河水暴漲夜衝北城壞居人廬舍
及州宇倉庫即日命彰德軍節度使魏咸信知州事遣

侍御史元紀劾知州工部侍郎郭贊等不預修防事民溺死者人給錢闕食者量予賑給今年屋稅公納物並權除放河水合御河并山水奔注大名府知府趙言分兵夫填築堤岸雍城門遂不為患降詔褒獎并存撫軍吏百姓至道元年十二月京兆府通判楊覃言官買修河竹六十餘萬帝曰渭川千畝竹與千戶侯等聞關右百姓竹園官中斫伐殆盡不及往日蕃盛此蓋三司失計度所致自今官所須竹量多少採取厚償其直存其竹根則新竹可望矣呂端曰芟葦亦可以為索甚堅韌後唐莊宗自楊留口渡河造舟為梁只用葦索因命樞密院分遣使臣詣河上刈葦為索然以脆不用遂寢

三年正月遣內臣往澶州沿河點檢竹索以官費甚多吏或侵擾為姦故令閱數裁減之 真宗咸平三年五月河決鄆州王陵埽浮鉅野入淮泗水勢悍激侵迫州城命步軍都虞侯張進內侍副都知閻承翰率諸州丁男二萬人往塞之至十一月塞河功畢遣使存恤被水災令給以口糧知州馬襄通判孔某坐免官巡河隄左藏庫使李繼原配隸許州 六年十二月雄州何承矩言乞開瀕棣州界黃河入赤河北流東匯于海甚為長久之利真宗曰此屢有言者亦曾經度計役千萬工浸數縣民田壞居人廬舍終恐非便不可行也 景德元年二月詔每歲遣使閱視黃汴河隄回日具奏保以

奏異時有壞決連坐其罪修護渠各有官屬使者暫往
安可專責自今罷之 九月二十九日河決澶州橫埽
命起居舍人知制誥李宗諤馳往設祭遣侍衛馬軍都
指揮使威德軍節度使葛霸為澶州修河都總管崇儀
使張利涉內殿崇班王懷昭副之又遣使視決河漂溢
之所官給船濟之民乏食者計口賑救 二年十月詔
汧河州軍長吏通判自今任滿候水落乃得代還又令
汧河縣令主簿更互出視隄防 十一月以內殿崇班
閻門祇候錢昭晟為崇儀副使 昭晟計春料孽畫省
功減費親自行視無虞故有賞 五年七月詔自今修
繕河隄不得更減功料是春陽武酸棗河隄使者以省

功科為勞課丞命選勤幹者代之 九月詔沿黃河隸

後兵匠自今除月廩外別給口糧 十二月詔沿黃河

州軍知州知軍通判令佐等在任三年修護隄埽牢固

別無遺累得替日免短使依例磨勘與家便差遣令佐

亦放選注家便官 是年河決滑州王八埽詔發兵夫

完治之費功十餘萬乃成 大中祥符元年四月遣中

使四人分護鄆濮等州河隄以馳道所歷謹備豫也

三年五月京西提點刑獄司上言河陽高紳修黃河岸

以葉石累之計省功鉅萬頗為堅固詔獎之 八月二

十五日滑州言大河順道北流詔遣職方員外郎劉益

馳往設祭 十二月帝謂知樞密院王欽若等曰河防

所設本各有因官司相度容易廢毀或恣形勢請射或容疆戶侵耕非次奔流多貽墊決蓋聽授之不審亦興復之倍艱可降詔諭沿河官吏及巡河使臣所管舊日大小隄並依舊存留不得專擅移易內有妥實不便須合改更處具本處何人規畫於何年修築及明陳改更利害以聞 四年八月河決通利軍又合御河流注大名府城害民田人多溺死詔遣官致祭賜被水家米一斛 是年遣使滑州經度西岸開減水河朝議以疏治此河可以折水勢省民力事畢詔獎獻言者 五年正月棟州言河決鼎家口請徙州城帝曰城去河尚十數里居民重遷又命內殿崇班史崇貴入內供奉官王文

慶與轉運使王曉李應機完塞既成又決於州東南李
民灣環城數十里民舍多壞曉等又請徙於滴河詔閤
門祇候郭盛覆視之如其請 五月又遣太常博士孫
冲內殿崇班衛承慶按視之冲言城可固護止費功三
十萬與曉更陳利害即遣冲知棣州承慶為兵馬都監
冲又薦大理寺丞史瑩知水事遂以瑩通判棣州瑩俄
以異議被絀冲御下嚴刻有行新隄上者必杖之役興
踰年雖扞護完築裁免決溢而湍流溢暴壩地益削河
勢高民屋迫踰丈矣民苦久役而終憂水患乃罷冲等
徙州 八月命東染院使秦義開封府官寇弦來傳至
鄆州按視河隄城池圖上利害 七年二月詔如聞河

北濱

州修葺遙隄料配勞苦亦有逃亡者可諭轉運

使使勿修疊別作規畫無致闕悞

八月遣使視

州

河隄還言城南河高二三丈知州殿中侍御史孫冲守

護過嚴民輸租踐隄者亦笞之詔擇官代之乃命轉運

使李士衡張士遜徙州於揚信之八方寺

八年二月

命三司戶部副使李及西上閣門使夏守贊馳傳詣滑

州與河京西轉運使議開減水河害先是京西轉運使

陳堯佐等請於滑州開小河以分水勢河北轉運使李

士衡等言將為魏博民患請罷之帝曰各疵所部非公

也故命及等覆視及等使迴請于三迎陽村北開河仍

于新河別開汭河如河水湍激即令兵卒之習水者決

導從之 三月令滑州都監監押二員每月更巡河上
提轄六埽修河物料詔京西轉運使俟農隙日量發二
匠課取石段備修河陽埽岸 四月詔汳河諸埽巡河
使臣各給當直軍士五人監物料使臣各三人並以本
城充自今不得輒差河清卒 是月遣使滑州與知州
通判同閱茭地盡令刈送官場 七月令京東路提點
刑獄滕涉常希古與本路轉運同定奪鄆濮州規置茭
地久遠利害 九年正月三門白波發運使言汳河山
林約採得梢九十萬計役八千夫一月命發運使陳麗
夫躬自臨視仍官給糧食畢日即散 四月詔自今汳
黃河令佐三年二年在本縣地分修護河隄埽岸一年

差出別縣界亦修護隄並得牢固者只免選注合入官
即不注家便如三年內俱在本縣地分修護河隄別無
疎虞即依先降敕命施行 十二月河北都轉運使李
士衡言滑州魚池埽水勢湍急知通利軍鄭希甫請於
本埽下開減水河相度利便從之 天禧元年十月滑
州監押侍禁勾重貴言準先降敕知州軍通判官令佐
巡檢河隄埽岸使臣得替後並有酬獎惟不及都監監
押詔自今替日與免短使 三年六月滑州河溢州地
西北天臺山旁俄復潰于城西南岸摧七百步漫流州
城民多漂沒歷澶濮曹鄆注梁山泊濟徐州界又合清
河古汴河上流入淮軍士溺死者千餘人遣馬步都軍

頭崔鑒領宣武卒四百人巡護詔光祿少卿薛願西上
閤門使張昭遠體量規畫仍與京東京西河北轉運使
會議遣使具舟以濟行者又遣閤門祇候薛貽廓相度
水口以侍衛步軍都虞候馮守信為滑州修河總管兼
知滑州魏州團練使郝榮副之崇儀使入內押班鄧守
恩為鈐轄薛貽廓內殿崇班楊懷吉並為都監遣御史
馳驛劾滑州官吏之罪貽廓言修河物料望差官提點
支納及差木石匠各百人從之命屯田員外郎崔立內
殿崇班閻文慶往涖其令入內供奉官吏崇楊繼斌以
馬步卒二百四十人巡邏兩岸捕緝賊盜修護隄岸牛
忠又言河水有復故道者及請發河清辛葺治魚池埽

臺從之

八月命樞密直學士王曉客省副使焦守節

馳驛詣滑州與馮守信等議京東西河北轉運使合要
人夫與役時日及具合役日限以聞其本州合要修河
物料錢帛糧草等除見有備外仍令時等同知撥般運
應辦給用連書以聞仍賜宴犒 九月三司請於開封
府等縣敷配修河榆柳雜梢五十萬以中等以上戶秋
稅科折從之 十二月都官員外郎鄭希甫言通利軍
至澶州黃河隄岸沙淤慮將來堙塞河口水遷舊河衝
注溢岸望令逐州軍增築舊隄一二尺備之詔可 四
年正月命翰林學士盛度言白馬軍將塞河又命右諫
議大夫張士遜往祭仍詔馮守信俟河平留兵夫萬人

護之是役凡賦諸州薪石槎芟竹千六百萬發兵夫九
萬人治之 二月河隄塞群臣入賀帝製滑州修河碑
建于福寧院乾文殿以紀成功又命翰林學士承旨晁
迥祭謝分遣官謝宮觀陵廟岳瀆群臣稱賀賜修河官
吏衣服金銀帶器帛將士緡錢有差 五月詔沿河州
軍自今每歲令長吏與巡河使臣躬視隄岸當浚築者
備書以聞勿復減省功料以圖恩獎違者寘重罪 八
月知制誥呂夷簡言伏見河再決滑州計功鉅萬以臣
所見未議修塞俟一二年間漸收稍芟然後興功兼聞
諸州有賤典賣莊田者蓋慮科率稍芟無以出辦望議
定未修河特詔諭州縣仍令滑州規度所湏稍芟以軍

人採伐或于近州秋稅折科從之 九月夷簡言景德
二年詔沿黃汴河春科檢計河隄合使物料人力今後
知州通判巡河使臣令佐若能用心點檢逐年大段減
剝得人功物料隄岸又得牢實不至疎虞與將在任減
剝得功料比附前界叙為勞績候得替到闕特行酬獎
臣今看詳伏恐沿河州軍官吏因此詔條每年多減功
料數目故得欲替敘為勞績以致隄岸漸至薄怯致昨
來河決滑州倍費功力修塞其景德二年十月九日敕
命令後更不行用詔審刑院大理寺定奪請如夷簡所
奏從之 是月國子博士王黃裳言竊見去年滑州決
河修築終未完固臣近過鄭州見黃汴河岸相去止五

十步許若來歲泛溢即入汴河口或至震驚都城願與
諸州長吏素行規度就直開浚必可省功料惜人民詔
黃裳馳驛往滑州與李應幾等同共規度修浚河口年
限并具功料以聞畢日同往鄭州召轉運使河隄官吏
等案視以聞十二月知滑州陳堯佐請令兵馬總管
同管勾隄事從之是月崇儀副使史瑩國子博士王
黃裳請於衛州等處規度分減黃河水勢詔與李垂親
視利害以聞五年正月詔曰乃春洪河是惟經濟決
溢為患今古攸同言念修完頗增勞費應沿滑州河口
且往修疊俟將來豐熟日指揮京畿京東西河北遭水
及積雨浸民田妨墾種縣分委轉運使與逐州長吏體

量詣實以聞議加優恤京東路河流所及地分尤廣特
差官往彼安撫五月詔應沁河州軍自今每歲檢計
管界河隄功料委逐處長吏或通判河隄官吏與都大
巡河本地分使臣躬親詳度如是隄岸怯弱河道埋塞
合行開濬修築即連書以聞不得復有減省功料以為
勞績希求恩賞違者寘深罪是月滑州開減水河功畢
河流漸復北岸命右諫議大夫李行簡致祭六月滑州
陳光佐言黃河泛漲河北岸撥堰放水其正河汊河並
入故道降詔獎諭仁宗天聖元年五月右諫議大夫
參知政事魯宗道往滑州相度修塞河口功料又遣太
常博士李渭隨宗道相視時滑州計度修塞功料聞奏

又渭嘗言修河利害故遣之 六月供奉官閤門祇候

簽書滑州事張均平言簽書州事兼管河隄將來修塞
河口功料排備物料分領役兵伏緣往來隔河恐失點
檢況修河亦有都監名目欲勉簽書州軍專令管勾河
口別命太常博士李渭為北作坊副使充修河都監

是月魯宗道言近奏鄭州判官王述前安利軍判官葛
湛充滑州職官同管修河公事今點檢滑州奏狀幕職
多出外縣不親書名欲乞特申戒約並須同共商議親
書文奏如有功過應干修河官並與知州已下一例施
行從之 八月中書言令京西等路色人有情願進納
修河梢并草者逐州軍數目十分中特與減放一分令

出榜曉示從之 二年八月遣度支員外郎祕閣校理
李垂內殿崇班閤門祇候張君平同往滑衛州相度水
勢及具合役功料數盡圖以聞 時議修塞故也京東
轉運使又奏本部羨財十萬貫充修河支用詔加獎諭
宰臣言滑州修河物料地理闊遠欲令本州相度添差
巡檢于高阜處積壘苦益不管疎虞損惡有悞將來支
用仁宗曰草數重逾千萬此皆出於民力不可枉致損
爛如此約束甚便 四年十二月詔滑州向下緣河埽
岸累降敕取責結罪文狀如疊口以後常切修貼不唯
疎虞尚慮官員使臣不切用心固護宜令接比春初差
夫興修預合固護仍以修過功料進取進止 五年八

月中書門下言近差內殿崇班史崇信入內供奉官段文德往滑州修疊固護怯薄隄官員照管兩隄恐將來水復舊河別有疎虞從之 九月二日御史知雜王駮

言伏覩敕命塞疊河口竊惟濮衛之郊連苦水旱趙魏之境昨經螟蝗倘加役使重益困窮欲乞應在京見有土木工不急修造處一切權罷邠併充河口差使詔從其請又遣知制誥程琳西上閤門使曹儀往滑州與修河總管等相度兵夫功作料數及密體量有無事件未便

八月詔京西轉運使洎滑州自今每五日一次具修河次第修疊步數隄岸平安聞奏 十月滑州言決河已塞水復故道帝召宰相於承明殿謂曰河決累年一旦

修塞遂除民患非獨靈意幽贊亦鄉等戮力王曾曰此
皆聖心憂吳憫昏墊之民上感穹昊致滋協順詔新修
埽以天臺埽為名郡有天臺山因以為名群臣稱賀于
崇德殿 十二月三日中書門下言天臺埽費工至大
向下軍州隄岸切在提舉修護欲令逐路轉運使往來
檢舉如有合行修貼固護逐處立便施行小有疎虞重
行朝典從之 十二日知制誥徐奭言近至滑州魚池
埽最是緊急聞得舊有減水河望令開浚詔滑州相度
本州言應役夫二萬八千餘一月工畢或以兵士漸次
興功計役萬二千人七十日詔差軍士興葺之 六年
三月六日滑州寇瑊言天臺埽塞河望付有司譔記詔

翰林學士宋綬謨述

十六日詔內殿崇班閣門祇候

戴潛高繼密分充澶滑安利軍天雄軍濮鄆齊州界都
大提舉修護黃河隄岸 是日新授京西轉運使楊嶠
言澶州每年檢河隄春料夫萬數並自濮鄆差往備見
勞擾欲乞只于外州抽兵士五七千人與河清兵士同
修從之 四月以鄆州言張秋埽發分兩岸名三百步
埽別差使臣巡護從之 是月詔澶滑州簽判職官自
今與知州同判管河隄事 八月澶州言楚州河水漲
溢衝決隄岸約三十步已役兵夫修壘 七年正月滑
州言得殿中丞簽書節度判官廳公事花尹等狀當準
州牒守宿巡掌物料隄埽緣舊敕只有知州同判無職

官防護條例河防重難深慮小人疎虞一例負責洎至
任滿又無優獎詔自今澶滑州簽判職官候得替日與
依知州同判例施行 五月承明殿詔示中書樞密院
高弁高繼密等所上黃河諸埽圖今議所行乞降付高
弁等議定從之 七月滑州言諸埽捉到河清軍士盜
斫泐隄林木者按天聖四年宣贓錢不滿千錢從違制
失定斷軍人刺面配西京開山指揮千錢已上奏裁切
緣軍兵多西京隣兵人規避重役故意盜林木以就決
配依舊收管若三犯即決配廣南遠惡州牢城從之
十二月都大巡護澶滑州隄高繼密請差近上官相度
河北岸自澶州鬼固埽下接大隄以次東北就高阜地

初築遙堤即詔龍圖閣待制韓億與京左藏庫使閻文
應內殿崇班閻門祇候康輿同往相度時御史高弁
亦請于澶州向上分作兩堤前蓬州良山令陳曜乞開
鄆州界黃河入麋丘河詔億等并議之時侍禁王乙差
韓億高弁同相度開澶州向上分兩河利害詔令弁與
陳曜乘驛計會億等就處規畫利便以聞八年正月
中書門下言河北轉運使胡則相度若未修塞王楚埽
外口且留人功物料固護緊急埽岸雖即利便又緣向
去河漲必是依舊衝滄去年遭水人戶欲下河北諸州
為水災人民貧困不易其王楚埽生隄水口令先計度
候澶州上下兩岸將來危急之處物料各有準備即議

修疊其王楚埽經水滄人令胡則常切存恤無致失所
十月三門白波發運使文洎言汾河諸埽岸物料內
山梢每年調河南陝府號解絳澤州人夫正月下旬入
山採斫寒節前畢雖官給口食緣遞年採斫山林漸稀
亦有一夫出錢三五千已上雇人採斫今年所差三萬
五千人內有三二家共著一丁應役之人計及十萬往
復千里已上苦辛可憫所有樁橛竹索出自向南北山
梢又更北遠雖芟榆所出地近勞役亦重近年計度迭
增新舊折腐實多山梢舊每年止一二百萬束去年所
及三百七十六萬束今年七百八千餘萬束以至竹索
樁橛比舊數倍多蓋是計料之時不以埽岸緊慢廣作

約束度多不使用積留枉耗今計汾河諸埽使外物料
尚有二千五百萬有餘稱是深損爛煤木不甚約直三
二千貫諸埽使臣懼見負罪培填上下蓋庇專望水逼
隄岸便作危急夾捲埽中虛行除破其外二千二百一
十萬稱堪好亦有不言堪與不堪使用此項物料有祥
符年納下稍芟比前項年歲益遠必慮損爛懼罪培填
未肯實報欲乞差官點檢依年分如法排埽準備支用
諸處係官物轉運使巡歷並皆點檢修河物料望令轉
運發運使依例點檢相度埽岸急慢物料多少遞旋移
那則經久別無朽損又不敢過外約度只如天聖三年
據諸州約度修河稍準教十分中減三五分已上亦無

闕候此明見元約數大又鄆州去年要稍九十九萬只般三十萬應副亦無闕候又今三月準三司牒據巡河魏昭素狀新置榮澤酸棗縣河岸水勢向著乞般山梢一月之內八次承牒莫非緊急遂併般三十一萬往彼訪聞逐埽去舊隄三四里般去稍並未曾使似此虛垛年深枉有損爛欲乞候差官點檢見數下提舉修河官將河退水慢埽見在物料相度撥與緊着埽分今後每秋約度來年物料乞令提舉官與知州軍縣令佐埽岸使臣相度先將河背慢埽物料就支及採榆柳使外據實少數申奏採買如埽慢河退物料數多提點司相度移用若致損爛不堪即申與本轄根勘候繼遣乞即放

雜任若新監官不切點檢被提舉官或後界使臣點檢
並乞嚴斷令逐婦置版榜備錄交割遵守施行又沿河
隄上甚有雜木並可採斫充梢橪竊聞諸處避見役使
人工意要綱運般載利於掌納辦濟不肯盡公約度況
河清兵士轉添數目欲乞委提舉官自今仔細約度雜
木斫梢橪數牒本州抽那人工兵士採斫漸減斫梢人
夫勞役亦有般運如依擘畫其利有五點檢物料見得
好惡依條結絕免致失陷一也移那物料逐旋支使不
致積壓枉致朽腐二也鈐轄交割必得近新物料修河
久固三也依實計度添斫榆柳減省遠地採買般運勞
費四也廢却閑埽不至枉差監專虛積物料五也詔三

司相度請悉如洎奏從之

慶厯元年三月詔權亭塞

滑州橫隴決河初遣內侍王克恭往議塞河又遣三司

戶部副使楊吉與入內侍省押班劉從愿繼往規度

其事而克恭詣先治金隄吉等言乘河北歲稔請塞橫

隴為便又下京東河北轉運司及都大巡河使臣與知

天雄軍李迪議利害而迪言功大不可就請止修金隄

以禦下流帝以為然故降是命 八月遣官澶州祭河

時方議開分水河以減湍暴之勢未定功而水自成道

州以其事聞特祠之 六年十月詔黃河諸埽官吏如

經大水抹岸歲滿並與遠地官八年七月分遣內臣往

河北陝西河東京東京西淮南六路勸誘進納修河梢

夏 是月命侍衛親軍馬軍副都指揮使郭承祐為澶
州修河都總管尋以知澶州又命三司戶部判官燕度
同知澶州兼管勾河口事時以河水為患也 是月命
翰林學士宋祁入內侍省內侍都知張永和往視商胡
埽決河及覆計工料而祁永和並言商胡水口見濶五
百五十七步用工一千四十二萬六千八百日役兵夫
一十萬四千二百六十人計一百日修塞畢 十二月
判大名府賈昌朝言按夏禹導河過覃懷至大伾醜為
二渠一即貝丘西南河書稱北過降水至于大陸者是
也一即漯川史說經東武陽由千乘入海者是也河自
平原以北播為九道齊桓公塞其八而并歸徒駭漢武

帝時決瓠子久為梁楚患後卒塞之築宮其上曰宣房
復禹舊跡至王莽時具邱西南渠遂竭九河盡滅獨用
漯川而歷代徒決不常然不越在渾濮之北魏博之東
即今澶滑之大河歷北京朝城由蒲臺入海者禹漢千
載之遺功也國朝以來開封大名懷滑澶鄆濮棣齊之
境河屢決天禧三年至四年夏連決天臺山傍尤甚凡
九載乃塞之天聖六年又敗王楚景初清于橫隴遂塞
王楚於是河獨從橫隴出至平原分金赤游三河經棣
濱之北入海近歲海口壅閉淖不可浚是以去年河敗
德博聞者凡二十一今夏潰於商胡經北都之東至於
武城遂貫御河歷冀瀛二州之城抵乾寧軍南達于海

今橫隴故水止存三分金赤游河皆已埋塞惟水壅京
口以東大污民田乃至於海自古河決為害莫甚于此
朝廷以朔方根本之地禦備戎虜取材用以饋軍師者
惟滄棣濱齊最厚自橫隴決則利耗半商胡之敗十失
其八九又況國家恃此大河內固京都外限胡馬祖宗
以來留意河防條禁嚴切者以此乃旁流散出甚有可
涉之處臣竊謂朝廷未之思也如或思之則不可不救
其敝臣愚竊謂救之之術莫若東復故道盡塞諸口按
橫隴以東至鄆濮間隄埽具在宜加完葺其湮淺之處
可以時發近縣夫開導至鄆州東界其南悉沿丘麓高
不能決北皆平原曠野無所阨束自古不為防岸以達

于海北歷世之長利也謹繪深川橫隴商胡三河為一
圖上進詔翰林侍讀學士郭勸入內侍省都知藍元
用與河北京東轉運使再行相度修復黃河故道利害
以聞勸等言自橫隴水口以東至鄆州銅城鎮規度地
勢高下使河復故道甚為大利凡開二百六十三里一
百八十步役四千四百十九萬四千九百六十功初河
決商胡又決郭固朝議修塞卒以不就 皇祐三年九
月觀文殿學士尚書右丞丁度等言奉詔定奪商胡郭
固塚水口蓋為見與恩冀州為患危急若便議修開商
胡水口緣所費物料人功萬數至多況今諸路災傷民
力未豐必至將來春水已前未能辦集郎來年恩冀州

水患未息兼商胡開塞之後河水未有所歸欲乞且令
速行計度人功物料多方修塞郭固口及勦立隄防固
護水勢其商胡口經久湏合修塞方免河北水患望選
諳知河水次第臣僚仔細踏行地勢相度定奪將來開
塞商胡之後河水合歸甚處流水的確利害及計定疏
理修渠逐項人功物料數目聞奏別降指揮預行計置
詔依所議其商胡口并故道累經相度更不差官檢計
只候來年秋修塞合要物料令三司檢會天禧年修河
體例敷配所貴衆力易集 至和二年十二月四日中
書門下言黃河自商胡決北流經大名恩冀之地久為
民患先議開銅城故道而塞商胡恐功大難卒就若緩

期又慮金隄汎溢不能捍固欲量集兵夫物料就六塔河見行水勢橫隴舊道以紓大名恩冀之患仍令河北京東轉運司應沿河州軍隄埽及牛羊道口預修完之內民田為水所占者具數以聞從之初黃河自商胡決北流經大名恩冀歲暴溢為患而提與仲昌等建議塞北流以入于六塔河以嘉祐元年四月塞商胡北流入六塔河北六塔河溢而不能容一夕河復決漂溺兵夫與提塞之費不可勝計于是言者以謂濟博濱棣之民重罹水患乃遣殿中侍御史吳中復帶御器械鄧守恭置獄于澶州修河官等並坐奉詔俟秋冬塞北流而聽仲昌擅進既塞而復決枉費功料都監張懷恩與仲

昌仍生于河上盜所監臨物竊管 嘉祐七年七月河
北提點刑獄司言河決北京第五埽詔都水監丞王叔
夏與本路轉運使調兵夫完築之至八月埽成英宗治
平三年六月二十八日都水監言新知明州沈扶乞今
後黃河及諸河泛漲隄岸踈虞抹岸去處令轉運司於
鄆州選官檢視先驗照水口兩頭隄身內近經漲水退
落痕跡仔細打量相去隄面高下丈尺指定係是抹岸
為復衝決保明申監然後行其當職官吏若檢視官定
驗不實乞行嚴斷其恩州清陽縣界御河衝決乞特行
衝替令佐看詳自商胡橫流後來黃河與御河身相合
下流梗淤其御河雖係所屬縣分管勾緣承例不曾計

置應付人功物料修護昨因懷州界沁河決溢通注御
河水勢添漲倍過常歲致御河吞伏不盡自通利軍已
下破決隄岸甚多其恩州滑陽縣令佐失于修護犯在
赦前乞賜詳酌所有御河隄岸監司近曾奏請已令所
干州縣管勾常檢視修護預先計置物料人功有備如
計置不足即委都轉運司擘畫應副及令沁河逐縣令
佐官衙內各帶修護逐州通判專提舉修護並令管河
道隄岸令後河事有所責成從之以上國朝會要 二
股河 嘉祐八年二月詔判都水監韓琦監丞李立之
與河北都轉運使唐介同往相視修二股河治平三年
十月二十五日同判都水監張鞏言已與沈立同共相

度六塔河經久利害聞奏乞增修二股河上下約緣正當河衝灘面低下斜狹欲乞來春先且極力增修下約候夏秋委是牢固至次年方得相度緊慢次量進卷工約歸從之舊會要黃河二股河各五門今併二股河附于此

神宗熙寧元年七月十八日以京東轉運使大常少卿孫琳權都大提舉恩冀深等州修葺河隄二年五月一日詔尚書司勳員外郎知都水監丞李立之乘驛赴闕以議者多言二股河生隄不足築築之無利故詔與之計議七月二十四日同判都水監張鞏等言二股河上下約累經大河汎漲無虞乞差近上知河事臣僚一兩員計會本路轉運司與臣等及郡邑官吏

其詳求開塞北流利害及定時月仍相視東流南北提防功料詔送相度官翰林學士司馬光入內副都知張茂則相度以聞 八月六日詔張茂則張鞏與轉運司再同相度二股河下流隄岸利害及計工以聞光命司馬光其罷之上初遣光既而王安石恐與建議者不合乃罷其行 十七日張鞏等言躬親至二股河覩步下約東流河勢深快北流漸慢今相度下流怯薄隄防並未曾施功深恐危急別致決溢欲望依久未修塞河口例轉運使副一員專往下流州軍檢視隄防向着去處闕少人功料物計置其妨礙水行縣鎮且令固護仍一面相度遷移候河事定疊即歸本司其王亞乞令往

下流州軍同共照會管幹詔轉運使副一員與王亞計
會張茂則同去茂則又言二股河一面東傾水及八分
北流止及二分觀此水更無議論其張輩等見議修壘
漸次閉塞北流見同議定閉塞次第未敢便往二股河
下相度隄防乞差近上臣僚一二員赴二股河同議閉
塞北流詔更不差官並依累降指揮 十九日張輩等
言先準詔開治二股河今月十二日大河東徙北流淺
小十四日閉斷大河北流更卷欄水埽以禦捍暴漲水
勢用上木填壘次詔見役兵士特與等第支賜仍賜張
輩李立之器幣有差 九月五日程昉言二股北流今
已閉塞然御河水由冀州下流尚當疎導以絕河患又

言南河蔡河等處若以堰蓄水可復舊日塘灤為久長之利上批御河等水須合早議疎導可速處置其塘灤當措事令樞密院施行仍差權都水監丞劉彝與昉相度以聞 三年正月判北京翰琦言奉詔選委官相度體量見今東流隄防興功次第如何固免向去水患欲乞專委見在河上都水監官與轉運使相度必見利害或以近上經歷臣僚往彼檢覲詔若且罷御河工役併力治大北隄似為得策因令河北轉運司于御河抽那人夫兵卒赴東流工役其御河關人樞密院刷剗應副 十二月詔判都水監張翬候勾當迴日且在黃河東流照管候至夏秋水勢定疊即還司 四年七月二

十三日河決大名府第五埽 八月五日張茂則言奉
詔相度二股決河利害乞以開封府判官宗昌言都水
監丞河北興修水利官宮苑使帶御器械程昉同領役
事從之仍以昌言同判都水監 九月五日詔鄆州言
黃河溢水入故道行流令京東提舉常平倉司那官一
員前行相視深淺闊狹水所埽仍畫圖以聞 十二月
十四日賜河北轉運司度僧牒五百紫衣師號各二百
五十開修二股河上流并修塞第五埽決口 二十三日
命內侍省內侍押班李若愚宮苑使帶御器械程昉
同提舉修塞北京第五埽決口并門二股河上流 五
年三月十六日塞北京第五埽口導河入二股賜都大

提舉官宋昌言王令圖程昉等錢絹有差

四月二十

二日都大提舉修塞北京第五埽決河入內副都知張
茂則等言已塞第五埽令河入新開二股河詔賜茂則
以下御筵於大名府仍命右諫議大夫集賢殿學士宋
敏求就決河致祭 七年二月五日都提舉大名府界
金隄范子淵等言疎濬二股及清水鎮河通快其退背
魚肋河三道可以閉塞庶大河水併入清水鎮及二股
河兼退出民田不少詔如疏濬正派河道已深即閉塞
初外都水監丞同勾當公事張倫請於第四埽上下
簽開魚肋河可以引水勢復二股河故道命監丞劉璿
王令圖程昉參議以子淵等領其事又開直河深八尺

以濬川把疏治之至是子淵言疏濬功狀故有是詔
濬川把事詳見濬河司 四月十六日詔應黃河夏秋
水勢汎漲隄岸厄急須藉夫衆救護之處去所屬州府
五十里已上者委本埽中所屬縣分那令佐一員晝時
上言抽差急夫入役及申都水監丞司并本屬州府催
促應副仍令通判上河提舉如不至危急妄有拘集人
夫並坐違制之罪仍委按察官司覺察之 六月都水監
言監丞劉璿狀勘會北京界黃河自熙寧二年閉斷北
流後來累經橫決於許家港及清水鎮行流致水勢散
漫不成河槽常憂壅遏之患六年十月之內因外監
丞王令圖等各為大河行流清水鎮下入蒲泊散漫不

成河槽滄侵民田乞于北京第四第五埽等處開修直河使大河復還二股故道璿尋被旨相度還言其利尋已施行乃係金隄都大范子淵朱仲立等領其事開成其河計深八尺不住疎濬又緣向上魚肋河數道分奪水勢尋擘畫開斷魚肋河四道所貴捫撈水勢全入二股河行流今據北京新隄第五埽使臣康景通并德博州都大李襄等言自今歲開捫北京第五埽直河并南岸開斷魚肋河四道捫撈水勢全入二股河後來水勢節次添漲七尺二寸行流湍急不住擁塌河崖即目直河內水深二丈五至三丈已來而許家港清水鎮河極至清漫幾乎不流看詳二股河見今雖是水勢深快已

成河道蓋緣蒲泊已東接連清水鎮許家港向下直至
四界首漸次退出田土別無固護如向去却遇漫水出
崖未免依前牽迴河頭復成水患欲乞下外監丞司相
應候霜降水落得清水鎮河閉斷築淺河堤一道遮欄
漲水使大河復循故道別無走移壅塞之患及退出良
田數萬頃民得耕種兼退背下博州界堂邑等七埽減
省逐年修護之費公私俱濟所有退出田土內係官及
人戶未歸業地土即乞許逐旋召人承佃人戶歸業照
證分明即復給還監司勘會北京界第五埽所開直河
及用濟川把鐵龍瓜疏濬河道并閉塞魚肋河等元係
劉璿相度措置今又以為言乞差璿與監丞王令圖同

會外都水監丞司就計其事從之 九年正月十二日
同管勾外都水監丞司公事范子淵言北京第六端許
村港連二股河切慮向去漲水復至漫溢為患欲乞自
南岸魚肋埽接水水隄從之 四月十八日都水監丞
司言本監已相度致於許村港連接魚肋河築隄委是
利便見已興修 十年七月十七日黃河大決於曹村
下埽二十四日澶淵絕流河道南徙又東匯于梁山張
澤灤分為二派一合南清河入淮一合北清河入于海
凡灌郡縣四十五而濮齊鄆徐尤甚壞官亭民舍數萬
田三十萬頃上惻然矜愍遣御史按視而賑濟其民乃
案圖書相山川形勢詔以明年春作治修塞下都水監

考事計功以閏正首事距五月一日新隄成河還北流
詔獎賜官吏有差凡興功一百九十餘萬材一千二百
八十九萬錢米各三十萬 九月三日詔應大河決溢
見被水占壓民田虞並令當職官司速行疏畎 十一
月十四日都水監言勘會黃河遞年所役兵夫自來土
功別無成法昨列到土法今春試用委得經久可從之

宋會要 二股河

嘉祐二年有司言至河大水京城惟害宜自祥符縣萬家岡穿河直城南好草陂北入惠民河分注魯濟則無水患永通三年正月戊戌發卒調民穿河于京城西役工六十萬九月成癸巳名曰永濟河十一月己丑置都水監五年春河北漕韓贄穿二股渠分河流入金赤河役夫三千一月而畢七月丙辰上二股河圖八年贄判都水二月命贄及丞李立之與河北漕唐界按視脩二股河治平元年五月命都水浚二股河紓恩與水災熙寧元年十一月十三日命學士司馬光度二股河利害二年八月五日己亥光言禹分九河漢驪二渠河順則

為患小矣河併為一則勞費倍分為二則費減半張鞏
等欲塞二股河為北流恐費大而功不成十四日鞏言
北流已塞年久詔開斷北流四年七月河決大明五年
三月塞之導河入二股七年浚魚助河復二股河故道
元祐七年呂大防曰黃河持議者有三說一曰回河二
曰塞河三曰分水為四堤二河分減水勢實為大利

治河下二股河附

元豐元年閏正月一日提舉修閉曹村決口所言以
今月十一日築簽提閉脫水河遣權判太常寺李清臣
乘驛告祭就差走馬承受韓永式齋香建道場三晝夜
仍令候河水稍渾閉口毋得沙損京東民田二十八
日修閉曹村決口所言昨計修閉之功凡役兵二萬人

而今止得一萬五千人有奇詔河東路開封府界差催
萬夫 二月五日詔提舉修開曹村決口所察視兵夫
飲食有如疾病令醫官用心治療具全失分釐以聞當
議賞罰 三月四日詔都水監調發汴口水勢通接淮
汴行運其曹村決口水雖已還故道三日一具疏濬次
第以聞賜塞決河役兵特支錢 二十五日詔大河初
復故道尚或壅遏令都水監遣丞一員於上流王供等
埽往來照管及別差官提點下流隄埽 二十七日賜
度牒二百道付河北轉運司以市年計修河物料 四
月二日詔塞河役衆闕醫治疾令翰林醫官院選醫學
二人馳驛給券以往 二十一日詔太醫局選醫生十

人給官局熟藥乘驛詣曹村決河醫治見役兵夫 二
十五日提舉修閉曹村決口言已塞決口詔改新閉曹
村埽曰靈平遣樞密學士尚書右司郎中陳襄祭謝初
決口屢塞不能絕流財力俱竭燕達等相視無策有小
赤蛇出于上流衆以為神共禱之一夕沙漲河遂塞故
賜名埽曰靈平廟曰靈顯 同日詔新閉曹村埽都總
管燕達兼都大提舉修閉決口外都水監王令圖權同
提舉修護務令堅實仍遣中使撫問賜燕達以下御筵
二十八日詔新埽役兵疲于盛暑可三分日力用二
分全役一分與故半功午暑聽少休息 五月六日羣
臣上表賀塞曹村決口河復故道同日詔塞決河口

卒聽自陳仍俱被差急夫合如何優恤其部夫官分若干等第以聞 同日都大提舉修閑曹村決口所見修河堤增卑培薄正須兵夫赴役候漲水定即先降指揮分日力三分之一放半功承受韓永式言新修馬頭于大河傾注之間簽成隄岸河流雖斷隄面尚墊猶須衆力乞且留諸處役兵一月候馬頭不墊新隄增固委都大提舉所減放實選役兵萬人俟過漲水聽還並從之 二十五日詔入內東頭供奉官韓永式轉兩官聽寄資其保明勞績優等轉兩官第一等轉一官減磨勘二年選人改合入官第二等轉一官選入循兩資第三等減磨勘三年總管及轉運司各減一等其靈平埽都大

及巡河等官滿日酬獎論塞決河之勞也 二十六日

詔權河北轉運副使尚書祠部郎中王居卿權發遣河北東路提舉刑獄汪輔之各減磨勘三年賞應副河事畢也 二十八日詔收河所減放諸埽河清客軍並歇泊十日如河防緊急入役即令向後補歇泊日 六月三日詔太常博士苗師中供備庫使朱伋立等二十三人各遷一官以與塞河決有勞故也 四日詔權都大主管巡護惠民河楊琰令任滿日再任賜度僧牒五十段自陳以夏津縣決河故道為大河塞曹封決口省人功物料錢百餘萬緡又五婦退背減罷使臣五員乞恩故也 七日詔河北路轉運司昨發塞決河急夫候發

春夫計日折免更蠲五分以京東路体量安撫黃廉上
言本路備水故也詳見水利門 十二日詔令逐路提
點刑獄官一員專檢督修河減放役兵 十三日詔都
水監聞減放塞河役兵多道死者宜指揮逐路提點形
獄官點檢催督早令達往營州軍 十七日詔都水監
應河埽物料于合應副路轉運及開封府界提點司取
三年中一中數為額交逐司管認應副錢物關本監計
置 七月十一日詔鎮安軍節度推官知澶州衛南縣
李夷白循一資初靈平埽闕草夷白市十餘束應^萬用都
水監乞優與推恩中書擬理為勞績上批夷白和買草
濟一時急用實為有功可特循一資 八月十六日賜

度僧牒六百付都水監分與開封府界提點及河北轉運司鬻之預買修河物料以其半市梢草還諸埽十

月十一日詔韓村埽巡河左班殿直武繼寧追一官勒停餘官衝替罰銅有差坐大河以風雨溢岸失於備預也 二十七日詔罷左藏庫副使霍舜舉西京左藏庫副使王鑒提舉黃汴等河榆柳止令逐地分使臣兼管及委都大官提舉以都水監言剥杞累年今已成緒故也 十二月十八日三司言準送下判都水監宋昌言等奏乞支錢二十萬緡分與開州府界河北路諸埽市梢草未有錢物可給欲支市易務界未鹽錢十萬緡從三司撥付本監依朝廷錢物例封樁逐年依數兌換非

朝旨及埽岸危急支盡年計物料毋得支用從三司點檢拘轄從之 二年三月八日知都水監丞范子淵言修黃河南岸治水隄乞給人兵物料緡錢詔發卒三千人給官莊司熟藥所錢共三萬緡公用錢二百千 四月十二日詔司農寺出坊場錢十萬緡賜導洛通汴司增給吏兵食錢內以二萬緡給范子淵為固護黃河南岸薪芻之費 六月五日都水監言去月二十八日澶州明公埽墊詔明公埽最為河流向著其南繞隔大隄一重備之不時則與靈平之患無異本埽見闕正官外都水監丞可達奏舉差出埽兵亦即追還以防夏秋漲水 七月二十二日知都水監丞范子淵言固護黃河

南岸畢工之中外分為兩埽詔以廣武上下埽為名也九月二日前京西轉運副使屯田員外郎李南公減磨勘三年餘十一人遷官減磨勘并陞名次有差以固護夫河南岸有勞也七日上批近差都水監幹當公事錢曜檢定諸埽春料聞都大司已計夫二十餘萬外尚有五都大司及諸河工料如此則來歲雖起三四十萬夫未能應副公私財用枉費過當深為可惜錢曜新作水官未歷河事恐為汭河冒利者所罔不能究悉底裏可差本監主簿陳祐甫代曜檢定以聞三年四月十九日前河北路轉運副使陳知儉罰銅三十斤前提點河北路刑獄韓正彥罰銅二十斤坐河決曹村失

備也 五月十三日司農少卿前知衛州魯有闕罰銅
二十斤通州幕職官汲縣主簿尉並銜替巡河部役官
追官勒停差替並坐河溢失救護也二十四日都水監
言同外監丞并諸都大定議黃河諸埽向着退背分三
等會兵夫物料數乞令判監一員按視推行詔遣判監
劉定 六月十五日權判都水監張唐民請復黃汴諸
河歲差修河客軍九千人額從之 二十五日御史滿
中行言昨曹村河決止坐都水監當任官竊以河防堅
固非朝夕可致量罪定罰宜以供職久近為差詔中書
立到官日限法 七月七日詔雄州廣武上下埽役兵
方盛暑晝夜即工可與特支錢賜部役官夏藥 八月

十二日河陽言雄武埽七月二十八日河水變移埽岸危急已發河陰濟源縣急夫各千人救護上批今歲夏秋農時並河之民累經調發人力已困又前奏雄武河流離埽已遠更無可虞豈有伏槽之際致危急之理比乃官司不恤百姓疲于役事信監埽使臣張皇呼噪可遣權提點開封府界諸縣鎮公事楊景畧按視如不應差發勅罪以聞 二十六日權提點開封府界諸縣鎮楊景畧言雄武埽自六月至七月累危急所調發五縣急夫共八千人而河陰縣獨占三千人本縣有災傷十分鄉而坊郭差至第四等有一戶一日之內出百十七夫者比之他縣尤為困擾詔河陰縣所差急夫折免春

夫外每戶更免雜稅錢三千如不足即計年折除九
月二日權知都水監丞公事蘇液言河北京東河決朝
廷賑濟放稅靈津廟碑失載其實乞以其事付史官從
之十二月十一日知都水監主簿公事李士良言黃
河見管夫小使臣一百六十餘員並委監丞已上奉舉
其所舉未必習知水事欲乞今後河埽罷舉官之制並
委官西院三班院選差其都大提舉即乞且如舊從之
四年四月二十八日河北轉運使周革言小吳埽決
本州雖已發急夫六千人修塞續于鄰近差兵夫及舟
運薪芻其所役人數亦少乞許發近便州軍役兵及于
諸埽輟河清兵併力從之五月四日詔河決小吳埽

已全奪過大河若止循例以三千人急夫必不能塞方
蠶麥收成民力不宜妄有調發速令燕達相度如有以
以東退背諸埽兵可發即便不差急夫 同日澶州言
河決浸成小勢猛惡本州無近差撥及無梢草乞剗刷
本路兵五七百人及借支河埽楊椿千條梢二萬束本
州預買草四萬束從之 八日燕達言小吳道斷流今
接近漲水河門水口皆深闊探塌未定難計功料未可
修塞詔達且發赴闕李立之罷澶州權判都水監自河
陽至小吳決口點檢埽岸 十七日恩州言河決澶州
注入御河本州極危乞以州界退背諸埽梢草河清兵
及令北岸都水使臣并諸埽巡河使臣赴州部役從之

其稍草令北外都水丞司量應副 八月二十八日權
判都水監李立之言準朝旨小吳決口不閉令臣經畫
臣自決口相視河流至乾寧軍分入東西南塘次入界
河于劈地口入海通流無阻令檢計當立東西隄防計
役三百十四萬四千工詔知制誥知陳院舒亶三司判
度支副使直司館蹇周輔再相視檢計 九月十七日
權判都水監李立之言北京南樂館陶宗城魏縣淺口
永濟延安鎮瀛州景城鎮在大河兩隄之間乞令轉運
司相度遷於隄外其小吳決口以下兩岸修隄計工不
少何清兵止有千餘人乞於南北兩丞地客軍存留五
千人更不收放東均與新立隄埽興修埽道依例月支

錢二百從之 十二月二十一日相視檢計黃隄防舒
亶言詳李立之所乞小吳決口以下舊河見管物料榆
柳差使臣等巡防又乞相州障河置安陽埽今詳舊河
已棄廢虛占使臣兵級乞下轉運司令付州縣以待都
水監給用其地遠難運元豐安轉運賣之以錢應副河防安
陽埽當增置立從之 五年二月二十三日提舉河北
黃河提司防言大河自恩州臨清縣西傾側向東入御
河衝刷河身深濬至恩州城下水行湍悍御河堤下閘
不能吞伏水墊今相度欲趁河水未漲以前下手閉塞
併歸大河詔如不碍漕運及灌注塘灤即依所奏施行
二十四日詔前知澶州韓琦都水監丞張次山蘇液

北外都水丞陳祐甫判都水監張唐民主簿李士良都水監幹當公事錢曜張元卿罰銅有差大小吳埽使臣各追一官勒停澶州通判幕職官臨河濮陽縣令佐衝替本路監司劾罪以去歲河決不能救護提舉也 四月十九日詔判都水監李立之理三司副使資序幹當官吏轉官支賜有差賞相度新河裁省工力之勞也 七月二十八日賜南外都水監丞司度僧牒六十備廣武上下埽 九月十三日詔賜陽武縣廣勇廣德兩指揮共級錢有差以八月二十九日河決原武軍人移營避水故也 十月十二日左侍禁班仲方言熙寧八年孫民先于衛州王供埽決大河傍西山北派南岸如禹

舊迹止遷深州可無水患當時朝廷雖相度未果施行
今大吳埽河決不塞略內黃縣北流已成正河上至王
供埽止二百餘里欲乞移本州界獲嘉汲縣上下衛鎮
齊賈蘇村王供七埽却治南岸堤道不移動深州可減
廢開封府界原武陽武宜村滑州界韓房石堰天臺魚
池迎陽澶州靈平十埽工料又大河遠離京城無慮河
患却乞于相衛州界黃河狹處繫浮橋以通虜使上批
河事已差塞周輔等相度仲方狀可送周輔 十三日
賜塞原武埽役兵特支錢有差 二十五日賜京西轉
運司度僧牒二百應赴原武埽 同日詔候原武埽其役
兵更特等第賜錢 十一月一日都水使者范子淵

言昨被旨救護廣武埽大河淪塌堤岸賴官吏卑力營
救遂獲安定宜蒙恩賞以勸後功詔轉運副使向宗旦
以下各減年陞名賜帛有差 六年三月一日詔河北
轉運判官呂大忠罰銅三十斤以黃河溢不即救護也
二十三日開封府界提點司言陽武縣尉權知縣張繹
昨黃河漲水注縣凡七處水決繹身先勞苦率衆用命
救護縣城公私以濟乞不依常制權知本縣詔繹特
改合入官知陽武縣 四月三日都水監丞李士良自
勅滄州清池埽舊以御河西岸作黃河新堤地薄下不
能制水已相度用御河東堤治為黃河大堤奏俟朝旨
昨為春夫已至役所臣輒令都大翔築生堤一道簽上

御河東堤詔釋之

閏六月二十一日賜開封府界提

點司度僧牒五百市陽武等埽物料

七月十七日雄

州言拒馬河溢破長沙口南北界例差兩地供輸民夫

修治上批去年決口兩界發夫已嘗興訟委雄州詳審

處置毋致生事

七年四月二十二日上批范子淵乞

發急夫萬人重修直河適當農時非次調發初出于不

得已今河口既未成功則其埽岸皆不須為之可更不

起發其見在河上急夫亦令放散上以子淵所修直河

不為功徒費工料以數十萬計故也既而子淵自言兩

修進鋸牙河口幾塞不虞漲水及風雨暴至致功敗于

垂成乞候霜降水落修閉詔子淵降一官仍不理提刑

資序也 六月十八日賜都水監度僧牒二百應副滑
州諸埽稍草 七月十一日詔開封府推官李士良提
舉救護陽武埽 十二月二十七日京西轉運司言每
歲於京西河陽差刈芟稍草夫納免夫錢應副洛口買
稍草南路八州隨唐房州舊不差夫金均鄆鄧襄州丁
多夫少者欲教納免夫錢河北州軍充還從之 八年
十月十八日河決大名府小漲口 十一月十六日知
澶州王令圖言曾建議回復大河故道未聞施行命吏
部侍郎陳安石入內都知張茂則同相視利害以聞尋
以勾當御藥院馮宗道代茂則 十二月十四日遣吏
部侍郎李常代陳安石相視黃河 哲宗天祐元年正

月十四日河北路轉運司言乞下相度黃河利害所自
迎陽埽至北京界孫村口于今春內便行施功及先修
舊河堤免新河枉費工向去夏秋別為大患詔李常等
相度施行訖奏如不可行即具事理以聞 二月六日
詔以未得雨澤權令罷修黃河其諸路兵夫並放歸元
來去處 四月四日吏部侍郎李常勾當御藥院馮家
道言準朝旨相度黃河利害臣等所至歷覽其堤防全
未高廣物料亦未有備緣堤防之設全繫水官物料之
蓄責在本道今經歲月尚爾未集以是知水官未得其
人欲乞添置使者詔添置外部水使者勾當公事各一
員北外部水丞隸外部水使者 七月四日保州言河

水汎溢漫及上皇墳地請就本州界來年春夫修築從之十一月二十三日詔以府界京東西路災傷權罷明年黃河年例春夫如係于河防緊急來春須合興役即計定的確夫數以聞三年正月十二日權發遣京東西路轉運判官張景先增差北河路轉運判官景先議開孫村口減水河與執政意合故有是命二年四月三日內殿承制知乾寧軍張赴以大河漲急護水有勞降敕書獎諭乃推恩官屬七人六月十二日詔賜北京恩冀州界修河役兵夏藥特給錢十一月二日三省樞密院言檢會都水使者王孝先狀伏思大河決塞不常為國之患屢矣此自小吳之決遂失隄防貽患

為甚欲乞於西岸上自北京內黃第三埽河先起截河堤一道與舊河孫村口相照仍相度于樊河第三河靠水各作縷河小堤間斷河門于大名府南第四鋪下至孫村口比倣往時作汴河規模開修減水河一道分殺水勢東趨入海尋召到李先及俞瑾等令陳述利害據孝先等稱除孫村口外更無不近界河可以回河入海去處其孫村口欲作二年開修今冬先備舊堤梢草一千萬束來春下手先開減水河分減水勢所用兵夫已有前甲定數至元祐五年方議開塞北流回改全河入東流故道已令孝先等供結罪保明狀訖看詳除預備舊堤物料便可放行外所有元祐五年閉回全河入東

流故道并來年開減水河處別有未盡利害欲差官躬
親相度具經久利害詣實奏聞詔差吏部侍郎范百祿
給事中趙君錫躬親往彼相度並具的確利害畫圖連
連銜保明聞奏如孫村口不可開河即別于不近界河
踏逐一處亦具保明聞奏回河事始末按實錄所載殊不
詳今取范百祿奏藁具載之庶後世有考焉 閏十二月
一日遷大名府南樂縣于金堤東增節村徙河北轉
運司之請也 四年正月二十八日詔罷回河先是范
百祿趙君錫等既受命未行大臣主議者乃密從中批
出曰黃河未復故道終為河北之患王孝先等所議已
嘗興役不可中罷宜接續功料向去決要回復故道右

僕射范純仁累疏論列上遂遣中使收回批旨使執政大臣與水官公心議論曰河之議自此稍緩後百祿君錫受詔同行相視東西二河度地形究利害見東流高仰北流順下知河決不可回即奏罷修河司至是始罷二月二日御史中丞李常言伏聞回河與減水河之議已奉德音悉令罷免凋瘵之民咸獲休息聖恩所加過半天下盛德之事傳之無窮四海幸甚其都水者王孝先乞重行黜降詔孝先知曹州七月八日詔復置外都水使者令河北路轉運使謝卿材兼領六月二十四日卿材再任河北十月六日左諫議大夫梁燾等言乞約束逐路監司及都水官吏應緣修河所用物料

除朝廷應副外並須和買不得擾民從之

十二月十

八日三省樞密院言昨令都提舉修河司從長擇一順處回河差夫八萬和雇二萬充引水正河工役外北外都丞司檢計到大河北流人夫共二十萬四千三百一十八人故道入夫七萬四千四百五十六人兩項共計二十七萬八千七百七十四人令都水監丞李君貺等檢計裁減到共十九萬四千九十八人詔令修河司且開減水河其差夫八萬人於數內減作四萬人充修河功役于李君貺等裁定春夫內共減作一十萬人令修河司通那分擘役使餘依前指揮

哲宗元祐五年二

月九日都水使者吳安特言州縣夫役舊以人丁戶

口科差今元祐令自第一至第五等皆以丁差不問貧富有偏重偏輕之弊請除以次降殺使輕重得所外其或用丁口或用等第聽州縣從便從之 三月二日都水使者吳安持言大河信水向生請鳩工預治所急詔發元豐庫封樁錢二十萬充雇直 十月十二日又書新提舉出賣解鹽孫迥知濮州則是此日差除於改易也當考之 十月二日罷都提舉修河司 六年十二月二十日工部言盜圻黃河埽渾木岸以待杖竄論其退背處減一等即徒以上罪于法不該配者亦配鄰州從之 七年八月九日詔科夫除逐路溝河夫外諸河防春夫每年以十萬人為額仍自科元祐八年分春夫

為始余並從之 二十一日御邇英閣侍讀顧臨讀寶訓至王公論引漳水灌溉王軫以為不可讀畢上問顧臨曰公軫所論孰長臨奏釋公軫所說意上曰是何說可行臨曰公說可行上宮中恭默不言唯謹讀時發問他日右僕射呂大防進曰臣側聞顧臨讀寶訓引漳河灌溉事臣謂大抵河渠利害最為難明朝廷不可不詳知本末如本朝黃河特議者有三說一曰迴河二曰塞河三曰分水今議者欲以兩河四堤勞費稍增久可無患如漢武帝時河決瓠子築隄防塞僅可支七十餘年本朝昨有二股河分流水勢粗免河患後因閉塞一股併入一股合流遂致決溢分水之利從可知矣今為四

堤二河分減水勢實為大利 九月十四日都水監言
準勅五百里外方許免夫自來府界黃河夫多不及五
百里緣人情皆願納錢免行今相度欲府界夫即不限
地里遠近但願納錢者聽從之 十一月三日權知乾
寧軍張元卿言本軍當諸河之衝會堤埽不可不治詔
乾寧軍埽岸令工部從都水監相度委令起夫近裏州
軍依例科夫功役不得過三百人如工役稍大本軍夫
不足即令都水監邵融應副 八年正月十日都水外
丞范緩言以武陵縣年例買山梢五萬束應副河埽若
徙于榮澤埽收買從都水監支遣為便從之 二十九
日吏部工部言河陽狀論列中渾一岸在大河中四面

俱是緊急向著而官吏有責無賞實為未均欲將本岸
立為第三等向著推賞從之 三十日中書侍郎范百
祿言切聞水官自元祐四年正月二十八日準敕罷歸
河後逐年併力修進梁村鋸牙并大河兩馬頭經今四
周年有餘用過工力浩澣兼三處並作第一等向著其
河清人數年計物料使臣酬獎並係第一等今鋸牙與
西馬頭連亘約及數十里其東馬頭進築與西馬頭相
向所以北流河門止有三百二十步闊以此多方盡力
樨抄水勢歲月既久湍迅安得不激射奔赴東流賴得
北流尚緊所以未至全河東去若如水官之意既進埽
渾又狹河門只留一百五十步及預乞朝廷候北流淺

小作軟堰閉斷詳此五事顯見必欲回河特以分水為名託云恐東流生淤陰行功計耳方且鼓唱言路以非為是致臺官章疏前後十餘中外傳聽不能無惑深恐不便臣愚切謂若大河東流別無患害在公在私有何不可只緣東流故道久來淤高雖累年偷工開濬豈能及得北流河道見行北里自是卑平兼元祐三年冬臣與趙君錫行河奏狀內東流故道隄岸缺破有牛羊道口車路等一萬一千餘處雖累年偷工完補豈能保得一例盡獲牢固若如水官之計乘緊流向東候北河淺小便要閉塞回奪全河即北京之北二十里許小張口等處不測衝決不則又以北二十里許田令公渠等處

亦不測衝決若只此等處決必皆復入北流大河為患未至甚大然而北京一境內外生聚沉沒為魚不勝其蓄矣若更捨此近處而向館陶以下決復在東岸則濱棣德博滄州等數十縣地土千餘里生靈將何以堪若水官恐向去疎虞避免憂責不敢明貢回河託以分水為說一向增進馬頭鋸牙巧設埽渾軟堰之類更積歲月之久必然大段淤却北流河道則將來緊流不免須奔東河其為患害正與回河無異顯是水官實欲收回河激倖之功而外不任回河敗事之責也朝廷容其施為亦已久矣今既悟其有害若不速行拯正且為改更一旦誤事安危所繫豈得穩便臣愚伏望二聖陛下詳

覽臣前件事理特軫睿慈深慮詔三省速議果法去圻
河上鋸牙兩頭馬開放河門任令大河自濬趨下致免
壅遏障塞淤壞北流積大害若北流通快將來每遇漲
水自然分水之利兩河並行久遠安便今日之計宜及
漲水已先前事措置庶免後悔若遂其過悔將無及臣
誠愚慙願不負二聖陛下憂國恤民之心貼黃稱臣去
冬以來都堂聚議及水官等白河事臣累說梁村鋸牙
兩馬頭甚非曲據擁撓河流逆水之性於大流不便及
曾簾前面具奏聞但以前未有章疏朝廷未能決議去圻
所以今來須至縷縷上瀆聖聽不任皇恐又稱臣竊以
壅防百川古人所忌周太子晉力諫靈王壅穀洛二水

之事是也。況黃河百川所聚，乃天地之絡脉，豈有以人力撻約不順其性，經久如此而不致患者？臣考古驗今灼見，不便區區愚心。既知如此，夙夜憂懼，不敢緘默。乞賜聖覽，特達施行。百禄又言：自元祐四年正月二十八日降勅，罷回河。後來臣僚回河之意，終不肯已。然而大河亦終不可回。二聖洞照河事，亦終不可惑。且如元祐四年秋，北京之南沙河直堤第七鋪決水，却近北還河。臣見朝廷別無施行，將謂無足憂者。近因外都水丞將到河圖方見畫樣上件決口，乃與大河一般。尋行取會據外丞司申打量到決口闊六里零二百八十五步。決口水勢正注北京橫簽堤，據如此口施廣闊，若將

來夏秋泛漲發隄禦悍不定北京豈不寒心而水官恬然曾不顧恤但務掩蔽止欲朝廷不知此意豈得穩便況吳安持等方日生巧計壅遏北流前後多端致大河漸有填淤之害窳壞禹迹之舊豈不勝可惜哉若北流湮塞而東流足以吞納全河別無疎虞有何不可止緣東流故道積淤歲久今其高仰出於屋之上河槽又狹而缺破處多安持等都不以此為憂惟欲僥倖萬一不顧危亡殊可怪駭況安持近已三次有狀乞替欲乞出自宸斷別選水官充代非特保全安持等實免久隳水政別致害事貼黃臣自聞得直隄決口的實後累于都堂會議及見行取會水官將來漲水其決口合如何措

置免致北京疎虞三省續奏聞次 三月二十二日乃
罷呂并議此段用蘇轍別志遺老傳增修實錄但云三
省進呈其間乃有韓忠彥議蓋實錄失不載樞密院乞
與河議一節故也畧志云其後六年間河遂復故道而
元符元年秋河又東決浸陽穀河勢要不可改舊而人
事不可知耳明年河遂北流 三月二十二日詔黃河
利害專責都水使者王宗望仍與不干礙屬官相度措
置施行具圖狀以聞其今月二日依相度定奪黃河利
害所降旨揮更不施行 七月四日都水監丞馮忱之
言廣武埽危急水勢刷塌堤岸欲乞築欄水簽堤一道
詔令馮忱之李偉郭茂恂相度從長措置 十一日詔

差入內高黃汝賢往廣武等埽傳宣撫問救護大河堤
埽官吏役兵兼賜銀合茶藥緡錢有差 十二日京西

轉運使兼南丞公事郭茂恂言廣武埽危急計置梢草
二百萬束如和買不及即乞依編敕于人戶科買從之
十四日詔差權戶部侍郎吳安持乘傳往廣武埽及
洛口措置救護如刷盡堤身閉洛口即相度可與不可
全閉如不鎖全閉即如何進埽節限水勢可保不致衝
決如令全閉即與甚處引水入汴 十八日上諭執政
曰聞河埽久不修故幾壞者數處魚池原武陽武皆已
遣水官乘疾置護從昨日報洛水又大溢注于河若廣
武埽壞大河與洛水合而為一則清汴不通矣京都漕

運殊可憂宜亟命吳安持與王宗望同力督作苟得不
壞地此亦須措置為久計其促安持往營度之 九月
十三日北外丞李舉之言春夫一月之限減縮不得過
三日遇夜及未明以前不得令入役如違官吏以違制
論從之 十月十四日左中散大夫直龍圖閣謝卿材
為福建陝西河北三路轉運使河北兼外都水使者時
河決小吳議者欲復東流卿材建言近歲河流稍行北
無可回之理上河議一編召赴政事堂會議持論不屈
忤大臣意徙河東轉運使 十一月十三日知南外丞
李偉言清汴貫京都下通淮泗自元祐以來屢危急而
今歲特甚臣相視就武濟河下尾廢堤祐河基址增修

疎導回截河勢東北行留舊埽作遙堤可以紓清汴
下注京城之患詔宗用臣陳祐甫覆按以聞 詳見汴

河門

十二月二十日權工部侍郎吳安持言京西路

轉運使拖欠年額稍草錢計七十萬貫有餘止稱歲計
窘之及應副軍儲無由辦集欲別賜錢物或降度牒收
買詔京西轉運司自紹興二年後合認諸埽年計稍額
錢並須依限數足 十八日詔祠部給空名度牒一千
道與北外丞司五百道與南外丞司令乘時計置稍草
二年六月三日詳定重修敕令所申明黃河泛橋火
禁揭榜于兩岸 元符元年正月十八日工部言今年
黃河埽并諸河合用春夫除年例人數外少三萬六千

五百人乞給度牒八百二十一道充雇夫錢從之 五
月二十七日詔朝散大夫試戶部尚書吳居厚朝散郎
權刑部侍郎周之道並轉一官發運副使張商英減磨
勘一年淮南轉運副使張元方賜帛以修支河畢功故
也 九月十九日水部員外郎曾孝廣言今河事已付
轉運司責州縣共力救護北流堤岸則北外都水丞別
無職事請並歸轉運司從之 三年正月八日吏部言
都大并河埽使臣兵士及修河物料雖不拘常制抽差
取射者並聽本監與轉運外丞司執奏占留從之 徽
宗崇寧元年六月二十九日臣寮言伏見黃河自商胡
口決以來治水者闢為兩堤相去數十里許不盡與

河爭以順其勢餘二十年河底漸淤積則河行地上失其本性一遇汎溢河道變徙自金堤第四埽第五埽決溢之後治水者惟與河相爭殊不原水性潤下豈特遏之而後行之先帝留神河事十餘年究覽孫民先之奏慨然下詔不得回瀾已而黃河漲淤刑洺深冀之間流行於瘠鹵低下之地入界河漂北界以歸于海自北京澶濮至于懷博齊鄆桑麻被野禾黍如雲可謂萬全之策矣中間大臣謀不出此必欲回河東流以破北流之議自商胡口決之後一如先帝聖斷與孫民先所陳今錄民先書進呈乞下河北如其所說引水築堤去處以圖來上詔付三省 閏六月十四日詔翰林學士郭知

章為樞密直學士知鄧州都水使者黃思放罷皆以昔
論河事嘗主東流之議為言者所彈故也 七月八日樞
密直學士知鄧州郭知章以辨言官所彈降充龍圖閣
直閣學士 知章奏東流利害乞下都水監相度施行
朝廷未嘗以臣言為是尋下提轉安撫司都水監同共
相度第二次又差呂希純并亮采相度第三次又差王
宗望相度王宗望定議上稟朝廷遂開北流吳安持鄭
佑等各保過漲水二年累轉勅官其後河決諫官王祖
道乞罪水官亦未嘗一言及臣其水官得罪或安置臣
雖罷中書舍人尚得集賢殿修撰知和州未行間哲宗
有旨令上殿則當時朝廷已察見非臣之罪况前後臣

僚臺諫言東流者非一今來已經九年言事者不詳本
末至煩朝廷再有行遣伏望聖慈憫察檢會朝奉郎監
察御史郭知章奏臣竊見大河分東北生靈被害滋久
往年朝廷議欲回河蓋嘗患之而未能也今茲復故道
水之趨東者已不可遏若順而導之議閉北而行東其
利百倍近日朝廷遣使按視聞已閉梁村北流尚有闕
村張包河等處逐司議論未一臣論都水監水官也朝
夕從事于河上耳目之所聞見心志之所思慮議論之
所綴接莫非水也河流之曲折高下利害之輕重本末
宜熟知之矣今使水官不得盡其職而惑于浮議臣恐
河事一誤則北方之民未得安堵而樂業伏望陛下特

降睿旨專委水官以圖經久可行之策以幸河北一路元
元之民不勝幸甚又檢會朝奉郎監察御史郭知章奏
臣切見以大河分東北之流數年矣論議蠶起上感朝
廷之聽至今未決河北之民被患滋久亡失賦租蕩析
田畝其害不可勝計臣以謂地形有高卑水勢有逆順
河道有淺深水流有緩急利害皆可以目覩方茲隆冬
霜降水落復槽則利害易辦也臣比緣使事至河北
自澶入北京渡孫村口見水趨東者河甚濶而深又
自北京往涪州過楊家淺口渡見水之趨者纔十分之
二三然後知大河之閉北而行東無疑也今東流之河
即商胡之故道詢諸父老具言水舊行者七十餘年矣

今者水之復行天也殆非人力也而議者欲固違水之性必使趨北誠私憂過計也東流利害其大畧則存塘洎也通御河也固北都也復民田也至于隄防之費兵夫之役官員之教稍莫之用所省不貲則其利可勝言哉臣職為御史親見利害不敢不言如以臣言為可取即乞早降睿旨下都水監相度施行故有是詔二年五月十一日通直郎試都水使者趙霆奏臣切見黃河地分調發人夫修築埽岸每歲春首騷動良民數路戶口不獲安居內有地里遙遠科夫數多常至敗家破產以從役事民力用苦無計以免契勘滑州魚池埽今春合起夫役嘗令送納免夫之直却用上件夫錢收買土

檐增貼埽岸會計工料比之調夫反有增剩乞詔有司
應干堤岸埽合調春夫令依此例免夫買土仍照所屬
立為永法不惟河埽事務易於辦集又可以示寬恤元
元之意詔河防夫工歲役十萬濱河之民困于調發可
上戶出錢免夫下戶出力充役皆取其願買土修築可
相度條畫開奏 十八日通直郎都水使者趙霆劄子
契勘管埽岸丈官見今南北兩丞地分未有官員注授
處甚多蓋緣文臣管埽岸事下與巡河監場為敵上為
都大埽司所統凡舉執事動有牽制惟能雷同含糊漠然
不顧然後可以自保而復有失職連生之患不能雷
同含糊則必深中小人禍機今相度欲乞于大河應係

置都大去處各添文臣都大一員仍令本監選舉公勤
廉幹之人以充使之表裏相援安心職守吏部取到都
水監備元豐元年閏六月六日敕節文黃河逐處都大
並令本監不以文武官奏差詔今後都大並舉文官

三年六月六日朝散郎守都水使者吳玠奏伏覩黃河
自元豐年間小吳口決北流入御河下合西山諸水至
清州獨流寨三叉口併歸入海雖深得保固形勝之策
而歲月寢久行流侵犯塘堤衝壞道路齧損城寨臣近
蒙詔旨修治隄防禦捍漲溢然築八尺之堤當九河之
尾臣復恐他時經隔年歲其隄道為大河衝齧必不能
敵其湍猛之勢若不遇有損缺逐旋增修即又至隳壞

使與塘水相通則於邊防非計之得也欲增添埽兵創置官局又為並邊虜情不測或至疑似欲乞睿旨諸寨鋪依自来條令遇有步小工料即令寨鋪使臣營修無使損墊堤寨候任滿日依黃河榆柳法差官交割若果有用心修葺別無損壞其城寨官及巡廚堤道使臣並與依黃河第二等向着巡河法雜賞不唯無增兵創官戶疑而邊防得久完固詔如無違礙即依所奏施行政和元年正月十二日詔水監狀契勘見行河道次第將年額合得諸路河防春夫一十萬人相度均分黃河諸河合用春夫本監已將諸路春夫一十萬人相度均計檢準勅都水監狀春夫不具夫帳上朝廷只從本監

依數科撥路分具功役案名申尚書省今均前項役使
去訖詔今後科夫並依舊具抄擬奏所有元祐年指揮
內更不具夫帳上朝廷一節更不施行 二年三月一
日京畿轉運提刑司申相度到提刑乞管下陽武上下
酸棗三埽巡河使臣依大觀二年四月二十八日敕命
榮澤等八埽巡河兼巡檢捕盜賞罰差破捉賊兵員等
委是別無違礙經久可行從之 三年正月二十三日
詔訪聞黃河諸埽自來招填闕額兵士多是干繫人作
弊乞取錢物將本營年小子弟或不任工役之人一例
招刺致防工役枉破招軍例物衣糧請受自今後可將
合招河清兵士令外丞司委都大并巡河使臣揀選少

壯堪任工役之人招刺逐旋據招到人申都水監差不
干礙官覆驗如有招下年小或不堪工役之人乃立法
施行 二月六日勅尚書工部奏據都水監狀來鹿上
埽今年漲過常比之已前年分行流湍猛委係非次變
移河勢自降作第三等向着後來到今實及三年以上
乞依條陞作第二年向着檢會崇寧看詳尚書水部
條諸埽向着退背各分三等每三年一定若河勢非時
變移都水監申本部擬奏詔依都水監所乞深州束鹿
上埽作第二等向着 三月十六日勅中書省尚書省
送到屯田員外郎劉絳劄子契勘河清兵級於法諸處
不得抽差其擅差惜或內有役使者徒一年蓋廢功役

者有害隄防諸處功作名目抽差占破官司臨時申盡
朝旨須至發遣不能占留遂使本河闕人今欲乞除官
員依條差破白直人其承久例差占窠名條法不載者
並令本河勿收入役今後不許差占外諸處申請到朝
廷特旨并衝改一切條禁等指揮抽差本河兵級者並令
都水監執奏更不發遣詔從之 四年十一月七日都
水使者孟昌齡奏伏覲政和四年經過夏秋漲水河
流上下並行中道亦無汎溢緊急去處埽岸平兵伏乞
宣付史館及稱賀詔送秘書省許拜表稱賀官吏依條
推恩檢檜崇寧四年大河安流推恩体例本監使者監
丞主簿各轉一官人吏等第受賜詔經大河安流年分

三次都水監官轉一次工部官減三年磨勘經一次都水監官減三年磨勘工部官減二年經一次都水監官減二年磨勘工部官減一年磨勘內孟昌齡許回授本宗有官有服親人吏等第支賜 五年十月二十一日詔中散大夫王仲栢特差知冀州替辛昌宗赴闕以中書省言辛昌係武臣慮不諳河事也 六年閏正二十

八日工部奏知南外都水丞公事張克慙狀契勘本司管下三十四埽見闕四千七百七十人欲乞以十分為率內四分下都水監於北外都水丞司地分退慢埽分并諸州移撥其三分特許將合配五百里以下情犯稍輕之人依錢監法撥行配填其餘三分乞下所屬預

支例物錢帛責令畿西河北路側近州縣寄招逐施發遣並限半年湏管數足如有違慢去處從本司具因依申乞朝廷重賜施行工部令勘當除乞於北外都水丞司并諸路移撥人兵都水監稱有未便難議施行餘張克懋所乞事理施行刑部看詳張克懋所申乞將三分特許將合配五百里以下情理稍輕之人依錢監法撥行配填其錢監乞配填兵匠皆係免決配填今勘當欲下諸路州軍除犯疆盜及合配廣南遠惡州軍沙門島并殺人放火兇惡之人外將犯罪合配五百里以下之人不以情理輕重配填仍斷乞先刺刺配二字監送南外都水丞司分撥諸埽及填刺配埽分候教足申乞住

配詔依工部所奏內情輕人特免決刺填 七月二十
日詔勘會廣武雄武諸埽復背清汴雖已降指揮都水
監廣貯功料即今大河向着下瞰都城可令都水監常
切遵守元豐舊制于逐埽廣貯工料遇作枝梧不得少
有疎虞官吏當行軍法 十月十八日詔孟昌齡王仍
令學士院降詔獎諭寇茂孫等六人各轉一官孟擴等
十八人各減三年磨勘賈鎮等各減二年磨勘以戶部
尚書孟昌齡奏三山河橋經今漲水過並無疎虞具官吏
委有勞効乞行推賞故也 七年五月二十九日詔諸
免夫錢應差人管押赴詣定埽分送納者元科州縣先
具年分錢數押人姓名起發日月實封入遞報南北外

丞司仍別給行程付押人所至官司即時批書出入界日時遞相關報催促從南外都水監丞張瑁所請也八月三日詔訪聞河朔郡縣凡有逐急應副河埽梢草等物多是寄居命官子弟及舉人伎術道僧公吏人等別作名字攬納或干託時官權要以攬狀封送令佐恣其立價多取于民或民戶陪貼錢物郡縣為之理索甚失朝廷革弊恤民之意自今並以違御革論不以蔭贖及赦降自首原減許人告賞錢一千貫以犯人家財充當職官輒受請求者與同罪宣和元年五月四日太師魯國公蔡京等言伏覩宣示廣武埽所開直河大河水勢直趨下口不俟人力開撥大河已直入河行流皆

自陞下降香陳黜致舒解廣武危急臣不勝大慶伏乞
宣付史館四月九日奉聖旨送秘書省許拜表稱賀

九月二十五日詔汴河提岸司可就所役兵夫取土將
南岸自京至洛口廣闊厚實幫築務要勞壯不得減裂
自今後須管離堤岸三十步以外方許開掘種植蓮藕
等不致陂水腹背相滄浸如違以違御筆論 二十九
日文武百僚大師魯國公蔡京等言伏覩提舉三山河
橋孟昌齡奏奉御筆前去三山河措置西橋河道臣行
歷新堤諸埽點檢得南丞官漿淤所申管下三十五埽
自河清及廣武埽以下至三山正東南丞地分以來卧
南行流皆是向着埽分唯廣武諸埽又居都城之上腹

背清汴北年以來再軫聖慮今歲漲水之後諸埽岸下一例生灘河行中道實由聖德昭格上下神祇助順協濟偉績誠非人力所致伏望宣付史館詔送秘書省

十月二十三日詔淮南西路提點刑獄徐閔中前任知濬州日應副橋埽協力固護有勞特賜紫章服二年

八月二十日詔開修廣武直河分奪南岸生灘埽岸無虞者減勞費功和為大當職官暴露郊野日冒大暑委有勤瘁與常例恩賞不同可特依此推恩內減年人依文武臣比折選人依條施行提領措置官保和殿學士銀青光祿大夫孟昌齡與德軍節度使王仍各轉一官回授漕臣并兩州知州各應辦錢糧同京西轉運副使

時道河北轉運副使胡直孺李孝昌知河陽王序知懷
州李罕各進職一等其餘官吏第一等各轉一官資內
無資人候有名目日收使第二等各減三年磨勘諸色
人各支絹五匹 九月四日工部尚書陸德先等奏契
黃河南北兩外丞司管下文武都文官所屬河防職務
事體非輕須是諳曉河事之人方可倚辦熙寧以前選舉
曾經巡河兩任以上使臣至元豐前選一任之人充
條路具存此舉所差都大官往往不經河緩急難以倚
辦乞今後依元豐選舉曾經一任河端差遣無遺闕之
人充詔依元豐法 三年六月二十三日吏部奏案寧
三年六月十五日勅諸向着埽添差承務郎以上或

令錄以一員充管勾埽事大觀二年六月十四日勅諸
埽添差文臣罷政和二年七月五日奉聖旨南北外都
水丞司管下逐都大司各置文武官二員內文臣從朝
廷選差承務郎以上請歷河事人武臣令都水監依舊
條奏舉水部契勘準元豐六年閏六月十八日敕黃河
都大並令本監不以文武官指名奏差南北都水丞司
管下逐都大司元豐年只是通差文武官一員為額後
來添增都大一員即令每都大司文武官都大各一員
詔添差文臣都大指揮更不施行見任并已差人並罷
乃依省罷法令後依元豐法通差文武官一員 八月
二十七日詔訪聞今年六月冀州信都等埽大河暴漲

北外都水丞張克懋知州韓昭通判晁將之措置救護
有方各特轉一官 九月二十五日詔朝散大夫都水
監丞梁防職事修舉可令再任候廣武雄武埽平寧特
與轉行一官仍取旨陞擢差遣 四年七月二十九日
臣僚上言伏見恩州累修立大河堤道都水監行催促
工料等事為名舉辟文武官甚多至于百二十餘員例
皆受贍家居繫名本監漫不省所領為何事其間曾至
沒所者十無一二馬詔除正差官一十一員外餘並罷
今後都水監因事張官正兼管就委策並具所得指揮
姓名申尚書省差應都水監將作監見因事張官去處
限三日具見差委員數申尚書省裁定不得隱漏以上

如違並令御史臺覺察彈奏 九月二十三日太宰王
黼言昨孟昌齡計議河事至滑州韓村埽檢視河流注
衝寸金潭其勢就下未易禦遏近降詔旨畫定令就港
灣對開直河水司方議疏鑿於元畫處自成直河一道
寸金潭下水即流在役之人聚首仰歎乞付史館從之
五年八月十九日中書省言檢會京西路都轉運司
狀準都水監丞賈鎮劄子欲乞京西漕臣應副梢草一
百萬束今契勘本司每年合應副廣武埽稅草四百萬
束自来係將一百一十萬束年例科撥本色稅草外其
餘二百九十萬束昨宣和三年都水使者與本司官措
置令出備地理腳錢于黃河沿流去處置場收買遂將

本息合納秋雜錢細數每束納本脚錢七十五文共納錢二十一萬七千五百貫赴南水司並諸埽送納已訖今束稍草一百萬束價錢欲令南外都水丞司依已降指揮於納到逐年本脚錢內支給仍乞量度日限買納及依元降指揮差水部郎中龔端前去點檢自宣和三年以後納到稍草錢見在若干已買稍草若干見在稍草若干其錢有無移用所有買鎮奏上不實令大理寺取勘具業聞奏業取到旨尚書工省房並不檢貼檢照當行手分勒停職級降兩官 十一月二十九日都水使者韓杞奏昨奉聖旨令臣固護滑州天臺埽并降到御筆畫定圖子對岸開修直河臣到日躬親相視闊大

河水勢盡在聖畫直河內行流尋具劄子奏聞詔許拜
表稱賀 七年八月二十二日詔應辦廣武河事官職
修舉脩見宣力京西轉運副使劉民瞻韓奕忠各陞一
職提舉部夫官各減二年磨勘內趙鼎減三年受給差
遣官都壕寨分放工料官部從官彈壓官繫取土橋官
催促諸縣梢草官各減一年磨勘 十一月十九日南
郊制勘會河防免夫錢數目至多自今相度緊慢於合
興役婦分雇募人夫未買梢草外並椿留以備危急支
用訪聞並不依條例措置每至漲水危急旋行科撥人
夫配買梢草急于星火官吏寅緣為姦自今後並于河
防免夫錢內預行置辦并優立價直雇夫役使不得于

合卒之際却行差科 十二月二十二日詔河防免夫
錢並罷 以上續國朝會要